

中

外

詩

壇

國際學人酬唱集

羅尚主編

次韻答戎菴見懷

香港·何敬羣

少年虛度老無成，徒握詩籌寄性情。  
雲外塞鴻橫遠陣，窗前蟋蟀動秋聲。  
挾開塵網將焉往，但托空言吐不平。  
却喜相知勞問訊，放歌聊遣有涯生。

重陽登太平山遙奠先靈作

香港·涂公遂

奔輪歲月又重陽，忍涕登臨望祖鄉。  
一杖環山循舊徑，微風拂袂送新涼。  
飛鴻無影天空碧，叢木初凋菊有黃。

縱目繁華珠玉地，終憐文物付滄桑。

次韻答新雄臺北

前人

垂老吁嗟似放翁，幾驚白日貫長虹。  
山遙海闊懷人遠，柳瘦楓凋坐雨濛。  
亂世徒憐天尚醉，邪謠任撼道無窮。  
師儒分席同聲氣，額手鯤洋挹好風。

再疊韻奉答遂翁

陳新雄

香江最憶兩仙翁，筆力千鈞氣貫虹。  
久許詞壇揚姓字，更從人海啓冥濛。  
河山垂淚波難靜，鄉國生哀恨豈窮。

祇讀我公詩什後，浩然相激起雄風。

贈韓國史在東教授

前人

勝友新知史在東，臺員傾蓋笑顏豐。  
開顏歡語清塵接，淨眼欣看冀北空。  
韓夏交親夙因遠，文章雅韻一杯同。  
總由好尚深相契，抵掌當然氣若虹。

屢却東遊之邀有懷梁寒操葉公超

二先生

香港·許衍董

憶昔臺瀛訪舊遊，梁園葉館最宜秋。  
談鄉論世盤桓久，祇為南朝日落愁。  
貞松勁竹歲寒安，二老清標共一時。  
孤寄人間來復往，蒼涼身世有誰知。  
蹇謬陳言是患根，貞元朝士幾人存。  
頽風吹徹瀛洲土，往跡興亡不忍論。  
人亡邦瘁事多違，未忍重臨抱恨歸。  
一自梁摧葉殘後，舊時景物已全非。